

## **Ebbaluja eyi Pawulo gaṅandiihira Abarooma Abarooma Enyanjula**

Pawulo nj'owaṅandiihira *Abarooma* ebbaluja yino ṅagati w'omwaha ogw'ataanu neene n'ogwataanu namunaana oluvanyuma lw'ohusaaliwa hwa Kurisito. Mu biseera ebyo, Pawulo gaali ahiiri huhyala e Rooma. Abafugiirira Kurisito abomu Rooma aba gaṅandiihira, mwalimo Abayudaaya n'Abatali Abayudaaya. Ebbaluja yino gayiṅandiihira mu hibuga Koriiso eyi gaali mu ehiseera ehyo. Gendire abaatu bosibosi bafugiirire Yesu Kurisito era bamugondere (16:26).

Ehitabo hino hy'omugaso eyiri abafugiirira Kurisito abali hiisi ṅaatu mu ehiseera hyosihyosi olwohuba Pawulo anyonyola hu bunonosi ati hubusuna olw'ohufugiirira Yesu Kurisito. Abahugu mu by'Ebbayibbuli baloma baati omusingi gw'ebbaluja yino gwendiiye hu 1:16, oluloma luuti, *“Ese sihipambya soni ohubuulira Amaṅuliro Amalaṅi, olwohuba nj'engeri ya Hatonda ey'ohunonola Abayudaaya n'Abatali Bayudaaya abafugiirira Yesu.”*

### **Ebiri mu bbaluja yino mu buupi**

1. Pawulo geyanjula era aloma nohu bagaṅandiihira (1:1-15)
2. Obulamu w'abaatu n'engeri ey'ohunonoha (1:16-11:36)

3. Obulamu obu bafugiirira Kurisito bali n'ohubamo (12:1-15:13)
4. Obuheese (16)

### *Obuheese*

<sup>1</sup> Ndiise Pawulo omuñeeresa\* wa Yesu Kurisito oyu Hatonda galanga era ganjabula ohuba omuhwenda wuwe, ndomere abaatu Amañuliro Amalañi agañwa eyi ali. <sup>2</sup> Amañuliro gano Amalañi Hatonda gagasuubisa abaatu ohwema ahale nahale n'abita mu byañandiihiwa ebyabufu ebi banaabbi babe bañandiiha. <sup>3</sup> Era Amañuliro gano Amalañi gañamba hu Mwana wuwe oyu basaala hy'omuutu ohuñwa mu lulyo lwa habaha Dawudi. <sup>4</sup> Hatonda omwene gahihahasa ati Mwana wuwe ni gamulamusa n'atambisa amaani g'Omwoyo Omutukuvu. Omwana wuwe oyo nje Musengwa weefe Yesu Kurisito. <sup>5</sup> Hatonda n'abita mu Yesu oyo, gaapambira ehisasabirisi gaafuula muhwenda wuwe tiine ndomere Abatali Bayudaaya bosibosi obuhwenda buwe bahamudemuhira olw'ohumufugiirira. <sup>6</sup> Era enywe mwesi muli mu abo aba Hatonda galanga ohuba abaatu ba Yesu Kurisito.

<sup>7</sup> Mbañandiihira ebbaluña yino, abahoda eyiri Hatonda, enywe mwesimwesi aba galanga ohuba abaatu babe ni mumenyire mu hibuga e Rooma. Mbasabira ti Hatonda Seefe ni Musengwa Yesu Kurisito babañambire ehisasabirisi era babanje n'emiyaaya.

---

\* **1:1** 1:1 Oba omwidu.

### *Ohweyaasa n'ohusaba*

<sup>8</sup> Neheerera n'ohweyaasa Hatonda wange ni mbita mu Yesu Kurisito olwenywe mwesimwesi, olwohuba hiisi naatu mu hyalo hyosihyosi abaatu baloma hu hufugiirira hwenywe.

<sup>9</sup> Peeresa Hatonda n'omwoyo mulala ni ndomera abaatu Amanuliro Amalaji aganjamba hu Mwana wuwe. Hatonda oyo amanyire era abona ng'olu habuhyabuhya mbahonyaho mu husaba hwange. <sup>10</sup> Era hiisi hiseera saba ti Hatonda mu husiima huhwe gegulejo engira niije mbaboneho. <sup>11</sup> Negomba ohuujya eyo ohubagumya mwahangala mu hufugiirira hwenywe. <sup>12</sup> Ko huloma hugobosaniemo amaani mu hufugiirira hwefe. <sup>13</sup> Aboluganda, nenda muhimanye muuti emirundi mingi nendire ohuujya eyo aye ohwola hatyane hihiri hujangaha. Nenda niije mbyeede ng'olu njedire Abatali Bayudaaya mu bifo ebindi mwesi mwahangala mu hufugiirira hwenywe. <sup>14</sup> Olwohuba ndi n'ebanja eryohulomera Abatali Bayudaaya† ab'esibo n'esibo, abalabuhi n'abanubeebe Amanuliro Amalaji. <sup>15</sup> Ehyo c'ehigima ni nenda ohubuulira Amanuliro Amalaji eyiri enywe mwesi abali e Rooma.

<sup>16</sup> Ese sihipambya soni ohubuulira Amanuliro Amalaji, olwohuba nj'engeri ya Hatonda ey'ohunonola Abayudaaya n'Abatali Bayudaaya abafugiirira Yesu.

<sup>17</sup> Hiri hiityo olwohuba mu Manuliro Amalaji Hatonda alaga engeri eyi asiimamo

† **1:14** 1:14,16 Ebbayibbuli ejindi jiroma jiiti Abayonaani n'abamawanga agandi.

omuutu olw’ohumufugiirira n’omwoyo mulala. Ehyo hiri hiityo ng’olu hyanjandiihiwa hiiti, “Oyo ahola ebirunamu alibanjo mulamu olw’ohufugiirira huhwe.”

*Ehirunji hya Hatonda eyiri abahola ebibi*

<sup>18</sup> Ehirunji hya Hatonda hiri huhwehuha ni hinjwa mwigulu hu baatu abatamumanyire era abahola ebibi ni beegalirisa ehituufu n’obubi waawe obubahola. <sup>19</sup> Ehyo hiri hiityo olwohuba hiisi muutu anjanga ohumanya ehituufu ehinjamba hu Hatonda ko weeyite olu omwene gaahena ohuta anjalafu ebimuhya.

<sup>20</sup> Ohunjwera erala hu hutonda hw’ehyalo, Hatonda oyu omuutu atanjanga hubona n’emoni ali n’obunangi emirembe n’emirembe era amaani gage gabonehera mu ebyo ebi gaahola. Era olw’ehyo abaatu abo banjuma hy’ohwenjamba ohugaana ohumujumirya.

<sup>21</sup> Wayire bamanyire baati Hatonda alinjo, sibamujumirya ng’olu hisaanira oba ohumweyaasa olw’ebyo ebi abanja. Mu hifo hy’ebyo, banjeeganga hu binambulamo n’emyoyo jaawe eminjubeebe nga ko jisirinjalira erala. <sup>22</sup> Wayire beranga ohuba bagesi aye beyongera husirinjala busirinjale.

<sup>23</sup> Era boola n’ohunjamba enono eri bahaanjaaye Hatonda atalifa emirembe n’emirembe, baalinja ebifaananyi ebibabbota obubbote ebifaana hy’abaatu, n’esolo, n’enyuni ko n’ebyenjalula.

<sup>24</sup> Olw’ehyo, Hatonda yeesi gabanjwaho gabaleha bahole obuhwedi ng’olu hwegomba hw’emyoyo jaawe hwali,

ng'ango ko beehola eby'obunemu. <sup>25</sup> Mu hifo hy'ohufugiirira amazima aganjamba hu Hatonda, basalango hufugiirira eby'obudulingi era nga bagobola hu hujumirya n'ohunjeeresa ebitonde obutonde mu hifo hya Hatonda omwene hubitonda. Oyo nj'oyu baatu bali n'ohuja enono emirembe n'emirembe. Amiina. <sup>26</sup> Olw'ebiitu hy'ebyo, Hatonda gabanwaho gabaleha bahole eby'obunemu ebi ohwegomba hwawe hubatuma. N'abahasi baawe boosi nga balehera ohwenimba n'abasinde bagobola mu huba n'abahasi bahyawe. <sup>27</sup> Mu ngeri nj'enyene, abasinde boosi baleeha engeri eyi Hatonda gatajo ey'ohwenimba n'abahasi bagobola hu basinde bahyawe. Abasinde bahola eby'obunemu n'abasinde bahyawe era nga basuna ehiguudyo olw'ebitoola byawe ebyo.

<sup>28</sup> Ni bahibona ti sihisaanira hutya Hatonda, nga yeesi abanjwaho abaleha bahole ebinumamo ebi batagwene huhola. <sup>29</sup> Nga beyijuusaho obubi obwa hiisi ngeri, omuli ohuhola ebibi, omulungo, n'obugwenyuh. Bejuuye egongi, omwoyo ogw'owiiti, ohujoberesania, obudulingi, n'ohulimirira abahyawe. Baatu abageesya olugambo, <sup>30</sup> abanjayirisa abahyawe, abatenda Hatonda, abanyoomi, abehudumbasa era abepaahapaaha, abaatiina ni basegango amagira amanyaha ag'ohuhola ebibi era abatagondera basaaye baawe. <sup>31</sup> Bahola eby'obunubeebe, banuma mazima wayire omwoyo ogulumirwa abahyawe, emyoyo jaawe jiri hy'eyesolo. <sup>32</sup> Wayire bahimanyire baati ehiragiyo hya Hatonda ehinumamo hwehubbira hiroma hiiti

abahola ebiitu hy'ebyo, Hatonda abasalira ogw'ohufa, sibahoma hu hubihola abeene hyonene aye basemba ni n'abo ababihola.

## 2

### *Hatonda asala omusango n'atehubbira*

<sup>1</sup> N̄aahani ewe osalira owahyo omusango olw'ehibi ehi aholire obula hyahwenjamba, olwohuba esambo eyi omusaliramo weesi oba ogwesalira, nange ti ebi omusalira omusango weesi mbebi ohola.\* <sup>2</sup> N̄aahani humanyire huuti Hatonda n'asalira abaatu hy'abo omusango guba guboola. <sup>3</sup> Aye ewe omuutu obuutu onabasalira omusango ate nga ko weesi ebi bahola mbebi ohola, on̄eega oti olinunuha Hatonda ohuguhusalira? <sup>4</sup> An̄o sooba n'otala ohwehalirihya n'ehyere hya Hatonda ehibitirifu? Somanyire oti Hatonda ahunambira ehisasabirisi wahehubba mu hifuba wacuusa omwoyo gugwo? <sup>5</sup> Aye olw'obuhahadafu w'omwoyo gugwo n'otenda hwebbwaga, wehumbaanihisya ho ehirunji hya Hatonda ehyo hu ludaalo olw'ekomero olu alisaliraho emisango n'atehubbira. <sup>6</sup> Hu ludaalo olwo "Hatonda alija hiisi muutu omuhemba ogwolana n'ebigahola."\* <sup>7</sup> Era abo abegumya ohuhola ebiranji olw'ohwenda Hatonda abambase enono n'obulamu obutanwan̄o, aja hubiban̄a. <sup>8</sup> Aye abo abahola ebyawe hu waawe ni banyumirwa eby'obudulingi mu hifo hy'amazima, Hatonda aja hubagudya n'ehirunji ehya'amaani. <sup>9</sup> Ebiitu

\* 2:1 2:1 Yis 52:5 \* 2:6 2:6 Zab 62:12

biriba bibi eyiri hiisi muutu ahola ebibi, ni bitandihira hu Muyudaaya ko ogoboseho Atali Muyudaaya. <sup>10</sup> Aye Hatonda alyambasa hiisi muutu ahola ebirani eṅono era gaamuṅa n'emiyaaya n'atagihira hu Muyudaaya nga ko aloosaho Atali Muyudaaya. <sup>11</sup> Hatonda alihola atyo olwohuba paṅo muutu oyu aboola.\*

<sup>12</sup> Wayire Abatali Bayudaaya baṅuma magambi aga Hatonda gaṅa Musa aye balibasalira omusango ni bateema hu magambi ago. Ne nibo Abayudaaya abahola ebibi, balibasalira omusango ni beema hu magambi olwohuba bagamanyire. <sup>13</sup> Bino mbiroma olwohuba abaatu aba Hatonda abala ohuba abagwalaafu simbaabo abanulira hunulira ebi magambi galoma aye abahola ebi galagira. <sup>14</sup> Abatali Bayudaaya baṅuma magambi aga Hatonda gaṅa Musa. Aye banahola ebiri mu magambi mu hutegeera hwawe ohw'obusaale, ehyo hiba egambi eyi bali. <sup>15</sup> Ebi bahola biraga biiti Hatonda gaṅandiiha amagambi hu myoyo jaawe. Era hireetera emyoyo jaawe ohubaloma jiiti hino oholire hirani oba hibi. <sup>16</sup> Bino biryolerera hu ludaalo olu Hatonda alisalira abaatu emisango n'abita mu Yesu Kurisito, ej'ebyo ebi baholanga mu ngiso era bunu nj'obuhwenda obu ndomera abaatu.

### *Abayudaaya n'Amagambi*

<sup>17</sup> Mwepaahapaaha olwohuba mbo muli Bayudaaya, abamanyire amagambi era mweginiha olwohuba mbo muli baatu ba Hatonda olw'ekolagana ey'enjabulo eriṅo

---

\* 2:11 2:11 Mag 10:17

ngati wenywe ni naye. <sup>18</sup> Era mweginiha olwohuba mbo mumanyire ebi Hatonda genda abaatu bahole olwohuba mubisoma mu magambi. <sup>19</sup> Era mwenjira ohuba ndinywe abanjambira abanjofu omuhoomero era muli enjase eyiri abo abahiiri mu hiirema. <sup>20</sup> Mwenjira ohuba abasomesa b'abanjubeebe era baabo abali hyabanjere abatamanyire ehi bahola. Ehyo muhiroma olwohuba mbo muli n'amagambi era mumanyire amazima. <sup>21</sup> Ale njahani enywe aberanga abahanjune, ni mundomere! Enywe abasomesa abandi, lwahiina simwesomesa mwabeene? Musomesa muuti abaatu bataba n'omuhono omuleeni aye enywe mugunuma? <sup>22</sup> Muloma muuti abaatu bataba n'emoni enyangu, enywe muyinuma? Muduhirira abajumirya ebifaananyi, ebitali Hatonda, aye simunjuuna mu bifo ebi bajumirihisyamo ohunyagulula ebyamo? <sup>23</sup> Enywe abepaaha mbo mugendera mu magambi ga Hatonda, simuhubba Hatonda esoni ni mugabbwaga? <sup>24</sup> Olw'ebyo ebi muhola, c'ehigima hyanandiihiwa hiiti, "Mugira Abatali Bayudaaya ni bafodogola Hatonda."

<sup>25</sup> Ohuomola olw'ohulaga oti oli muutu wa Hatonda, huba hwamahulu singa onjamba amagambi gage, aye onagabbwaga soobaho njabulo n'atali muhomole. <sup>26</sup> Singa Atali Muyudaaya gooheresa ebi magambi galoma, Hatonda saaja humunjira hy'Abayudaaya abahomola? <sup>27</sup> Atali Muyudaaya owooheresa ebi magambi galagira alihusalira ewe Omuyudaaya endiho omusango n'oba n'otagendera mu magambi wayire nga



wahomola.

<sup>28</sup> Omuutu saaba Muyudaaya endiho olw'ohwoheresa obulombolombo bw'Ehiyudaaya oba olw'ohuhomola. <sup>29</sup> Aye Omuyudaaya endiho nj'oyo ahola ebi Hatonda asiima era ohuhomola ohutuufu nj'ohwebbwaga wacuusa omwoyo sosi ohujamba bunambe amagambi agabanandiiha. Omuutu hy'oyo wayire abaatu sibamusiima, aye Hatonda niye amusiima.

### 3

#### *Owesigwa wa Hatonda*

<sup>1</sup> Ale njaaiani ohuba Omuyudaaya hiri n'omugaso hi, oba ohuhomola hugasa hi? <sup>2</sup> Ohuba Omuyudaaya higasa mu ngeri nyingi, ehisooka Abayudaaya mbaba Hatonda ganambya obuhwenda buwe.\*

<sup>3</sup> Aye singa Abayudaaya abandi sibafugiirira ebya Hatonda, ehyo hiba hiraga hiiti simwesigwa eyi bali? <sup>4</sup> Kadi nanadiidiri! Hiisi muutu anangire ohuba mudulingi aye Hatonda niye asigala n'ali w'amazima. Ng'olu hyanandiihiwa hiiti;

"Ko bahahase baati ewe Hatonda oloma amazima.

Siwehubbira n'osala emisango."\*

<sup>5</sup> Aye singa ebibi byefe Abayudaaya bita analafu obulanji wa Hatonda, huba n'ehyohuloma? Hatonda saaba mutuufu ohutugudya? (Bino

---

\* **3:2** 3:2 Eby'omugaso ebindi biri mu suula 9:4-5. \* **3:4** 3:4 Zab 51:4

mbiroma mu buutu). <sup>6</sup> Nenga sipohiri. Hatonda abanga ni gehubbira gahanjagire atye ohusalira abaatu bosibosi omusango? <sup>7</sup> Omuutu asobola ohwebuusa ati, “Obanga obutali we-sigwa wange bulaga ng’olu Hatonda ali mwe-sigwa era hireetera abaatu ohumujumirya, lwahiina gaasalira omusango?” <sup>8</sup> Ehyo hireeteera abandi ohumbenjeera baati mbo someza ti “Huhole ebibi ko ehyere hya Hatonda hyeyongere.” Ale Hatonda asalira abaatu abo abandom-aho baaty o musango.†

*Eņuma muutu wayire mulala asaana*

<sup>9</sup> Naahani ehituufu c’ehiri ne? Efe Abayudaaya huhira Abatali Bayudaaya ohuba abalanyi? Bbe, mu moni ja Hatonda abaatu hwesihwesi huli njaasi w’obunangi w’ehibi. <sup>10</sup> Ng’olu hyanandiihiwa hiiti;

Eņuma wayire mulala ahola ebirunamu.\*

<sup>11</sup> Eņuma ategeera ehiraņi ehuhuhola, wayire ayanira ohumanya Hatonda.

<sup>12</sup> Bosibosi banaba banwa hu Hatonda, bosibosi nalala bahola ebibi.

Era eņuma wayire mulala ahola ebirunamu.

<sup>13</sup> Ebi baloma biņunya ehibulu hy’ehigombe era ebi baloma byabudulingi.

Ebibono byawe biri hy’obusagwa w’etemu.

<sup>14</sup> Eminwa jaawe

jijofumula hujofumula ebiņwabo, ebibono bihambwe byerere.\*

---

† **3:8** 3:8 Ehi Pawulo agobolamo ohisaņana mu suula 6. \* **3:10**  
3:10 Zab 14:1-3; 53:1-3 \* **3:14** 3:14 Zab 10:7

15 Sibemoota hu hy'ohwita abahyawe.\*

16 Hiisi eyi baja

balehaŋo ohusihiiriha n'amaliro.

17 Ebiitu ebireeta emiyaaya, simbebibahola.

18 Ni Hatonda yeesi sibamuŋa eŋono.\*

19 Naahani humanyire huuti byosibyosi ebi mag-  
ambi galoma biŋamba hu Bayudaaya aba mag-  
ambi ga Musa gaŋuga, ŋaŋume oŋunuha Ha-  
tonda n'asalira abaatu omusango. 20 Olw'ehyo  
eŋuma muutu wayire mulala oyu Hatonda abala  
ohuba omugwalaafu olw'ohuŋamba amagambi  
ago olwohuba eŋuma owoheresa gosigosi. Aye  
amagambi ago gayeeda omuutu ohumanya  
n'abbengire.\*

*Batubala ohuba abagwalaafu olw'ohufugiirira  
Yesu*

21 Aye ŋaahani Hatonda ataaye aŋalafu en-  
gira eyi abaliramo abaatu ohuba abagwalaafu.  
Engira eyo amagambi aga gaŋambya Musa  
ko n'ebi abanaabbi baŋandiiha, biyiromaho.

22 Hatonda abala abaatu ohuba abagwalaafu  
olw'ohufugiirira Yesu Kurisito. Naŋuma njawulo  
ŋagati w'Abayudaaya n'Abatali Bayudaaya,\*

23 olwohuba abaatu bosibosi babbengi mu moni  
ja Hatonda era ŋaŋuma kadi mulala owolana  
n'eŋono lirye. 24 Aye abaatu bejeerera omu-  
sango hu wereere aŋaŋuma hubugula ndiŋi  
olw'ehisasabirisi hya Hatonda olw'ohufa hwa  
Yesu Kurisito hu musalabba ohwali endiŋi

---

\* **3:15** 3:15 Yis 59:7-8 \* **3:18** 3:18 Zab 36:1 \* **3:20** 3:20 Zab  
143:2; Bag 2:16 \* **3:22** 3:22 Bag 2:16

ey'ohubanunula. <sup>25</sup> Hatonda ohulaga ti sige-hubbira, gaṅayo Yesu bamuhomerere hu musal-abba afuuhe endiṅi olw'ebibi by'abaatu ko hi-isi amufugiirira, Hatonda amusonije. Ehyo gahihola olwohuba gehaliiriha ebibi ebi baatu baaholanga, ndabagudya. <sup>26</sup> Hino gahiholanga olw'ohwenda ohulaga abaatu mu hiseera hino ati sige-hubbira. Era hiisi muutu afugiirira Yesu gejeerera omusango.

<sup>27</sup> Naahani olwo huṅanga ohwepaaha huuti Hatonda atubala ohuba abagwalaafu olw'ebikolwa byefe ebiraṅi oba olw'ohuhuuma amagambi? Bbe sipohiri. Huba bagwalaafu lwa hufugiirira Yesu. <sup>28</sup> Huhinywanywasa huuti omuutu gejeerera omusango mu moni ja Hatonda olw'ohumufugiirira, aye silwahuhuuma amagambi. <sup>29</sup> Kaho Hatonda w'Abayudaaya boṅene? Omwene oyo sinje Hatonda w'Abatali Bayudaaya boosi? Ehituufu hiri hiiti abaatu bosibosi babe. <sup>30</sup> Hatonda omulala wogobbo oyo nje ow'Abayudaaya abahomola ko n'Abatali Bayudaaya abatahomola era nj'abala bosibosi ohuba abagwalaafu olw'ohumufugiirira. <sup>31</sup> Ni hiba hiityo olwo hulome huuti amagambi gaṅuma mahulu olw'ohufugiirira? Kadi naṅadiidiri! Wabula huganywanywasa bunywanywase.

## 4

*Yibbulayimu bamubala ohuba mugwalaafu olw'ohufugiirira*

<sup>1</sup> Naahani hunaalome hiina huhu sehulu yeefe Yibbulayimu gafaania hu binamba hu bugwalaafu? <sup>2</sup> Hatonda aba ni gabala Yibbulayimu ohuba mugwalaafu olw'ebikolwa bibye ebirani, gahabaaye n'ehyohwepaaha eyiri abaatu aye mu moni ja Hatonda gahanumire. <sup>3</sup> Ebyanandihwa biroma biiti, "Hatonda gabala Yibbulayimu ohuba mugwalaafu olw'ohufugiirira ebi gamuloma."\*

<sup>4</sup> Omuutu n'ahola omulimo, bamuḡa omuhemba aye sibamuḡa hirabo. <sup>5</sup> Hatonda abala omuutu omubi ohuba omugwalaafu lw'ohumufugiirira, sosi lw'ebikolwa bibye ebirani. <sup>6</sup> Era hino nj'ehi habaha Dawudi galoma hu muutu oyu Hatonda asiima n'ateemire hu hirani ehi aba n'aholire. <sup>7</sup> Galoma ati, "Gesimire oyo oyu basoniḡa ebibi bibye, <sup>8</sup> Gesimire oyo oyu Musengwa atabalira ebibi ebi aholire."\*

<sup>9</sup> Naahani ohwesiima ohwo hwa Bayudaaya bonene olwohuba bahomola oba n'Abatali Bayudaaya boosi wayire sibahomola? Hulomire huuti Hatonda gabala Yibbulayimu ohuba mugwalaafu olw'ohufugiirira ebi gamuloma. <sup>10</sup> Kaho Hatonda ohubala Yibbulayimu ohuba mugwalaafu, hwalino n'ahenire ohuhomola oba n'ahiiri? Hwalino ko ahene ahomole. <sup>11</sup> Ehiseera hyabitanjo nga ko bahomola Yibbulayimu, ng'ohuhomola huhwe huba habonero ohuhahasa haati Hatonda gamubala ohuba omugwalaafu olw'ohufugiirira. Era ng'afuuha

\* **4:3** 4:3 Tand 15:6      \* **4:8** 4:8 Zab 32:1-2

sehulu y'abaatu bosibosi aba babala ohuba abagwalaafu olw'ohufugiirira Hatonda wayire nga bahiiri huhomola.\* <sup>12</sup> Era Yibbulayimu oyo si sehulu w'Abayudaaya abahomole obuhomole hyoŋene, aye ni bafugiirira hya niye olu gafugiirira Hatonda ni bahiiri huhomola.

*Ebi Hatonda gasuubisa babisuna lwa humufugiirira*

<sup>13</sup> Hatonda sigasuubisa Yibbulayimu n'abomu lulyo lulwe ati baja hulya ehyalo olw'ohujamba amagambi ga Musa aye bamubala ohuba mugwalaafu olw'ohufugiirira.\* <sup>14</sup> Ohujamba amagambi hibanga nj'ehireteera Hatonda ohuŋa abaatu ebi gasuubisa, hani ohufugiirira huŋuma mahulu n'ehisuubiso ehyo hyahali hifu. <sup>15</sup> Olwohuba egambi lireetera Hatonda ohugudya abaatu n'ehiruŋi ehy'amaani. Era ni njanumaŋo egambi, siŋaba hulibbwaga.

<sup>16</sup> Olw'ehyo ehisuubiso hya Hatonda hyediiye hu humufugiirira. Era olw'ehisasabirisi hihye eriyo obuhahafu ti baja hu hisuna. Sigasuubisa abomu lulyo lwa Yibbulayimu abahuuma amagambi boŋene aye n'abafugiirira bosibosi ng'olu Yibbulayimu sehulu yeefe hwesihwesi gamufugiirira. <sup>17</sup> Ng'olu hyanandiihiwa hiiti, "Kufuuye sehulu y'abaatu abamawanga eduuli." Yibbulayimu oyo, nje sehulu yeefe mu moni ja Hatonda alamusa abafu era alagira ehinumaŋo hyabaŋo.\* <sup>18</sup> Yibbulayimu n'esuubi gafugiirira ebya Hatonda era gafuuha

---

\* **4:11** 4:11 Tand 17:10

\* **4:13** 4:13 Tand 17:4-6; 22:17-18

\* **4:17** 4:17 Tand 17:5

sehulu y'abaatu abamawanga eduuli ng'olu bamulomaho baati, "Oja huba n'olwebe lw'abaana ni batabaliha hy'emunyeenye." <sup>19</sup> Niiye siganjwamo amaani mu hufugiirira huhwe wayire gaali ajesa emyaha huupi cikumi ej'obuhulu era ni Saala omuhasi wuwe gaali asahulunjire n'ataheja namugulu. Bombi baali hy'abafu.\* <sup>20</sup> Sigabusabuusa aye geyongera ohufugiirira ebya Hatonda era n'amujumirya olw'ebyo ebi gaali n'aja humuḡa, <sup>21</sup> gaali n'obuheneerefu ati Hatonda ali n'obunangi ohwoheresa ehi gamusuubisa. <sup>22</sup> Hino nj'ehyagira bamubala ohuba mugwalaafu. <sup>23</sup> Ebibono ebiroma biiti, "Bamubala ohuba omugwalaafu" sibabinandiha hu Yibbulayimu yeḡene, <sup>24</sup> aye ni neefe hwesi aba Hatonda alibala ohuba abagwalaafu olw'ohufugiirira huuti niye nj'owalamusa Yesu Musengwa weefe ohuḡwa mu bafu. <sup>25</sup> Yesu oyo bamulyonayo era bamwita olw'ebibi byefe, aye Hatonda gamulamusa olw'efe ohwejeerera omusango.

## 5

### *Ohwejeerera omusango mu moni ja Hatonda*

<sup>1</sup> Olw'ohufa hwa Musengwa weefe Yesu Kurisito hwejeerera omusango olw'ohumufugiirira, era ḡaahani ḡaliḡo emiyaaya ḡagati weefe ni Hatonda. <sup>2</sup> Olw'ohufugiirira Kurisito hy'aḡeererera Hatonda ohutuḡambira ehisasabirisi era husuubira huuti luliba lulala hwaba mu bulamu

\* **4:19** 4:19 Tand 17:17

wuwe ow'enono. <sup>3</sup> Si c'ehyo hyonene aye humeedaho n'ohusanalya mu hubonaabona olw'ohufugiirira Kurisito ohu banamaani batwosaho olwohuba hituleetera ohwega ohwehaliiriha, <sup>4</sup> ng'ohwehaliiriha ohwo hutuñeererera ohuba n'obulamu obusangaasa Hatonda, ng'ehyo hituleetera ohuba n'esuubi huuti Hatonda alituhwehulira enono lirye. <sup>5</sup> Esuubi eri huli ni nalyo mu hihuumiriye eramu, humanyire huuti Hatonda saananga hutujuha olwohuba gatuna Omwoyo wuwe Omutukuvu ow'atuyombolera ohwenda huhwe mu myoyo jeefe.

<sup>6</sup> Ale ni hwali ni hutananga hwenonola, Kurisito gaafa hu lwefe ababi mu hiseera ehiragaane. <sup>7</sup> Sihiboneha ana n'ana ohufiiririra omuutu omugwalaafu wayire nga nananga ohubaano owenayo ohufiiririra ahola ebirani. <sup>8</sup> Aye Hatonda galaga ng'olu atwenda olwohuba wayire nga hwali huhiiri babi eyi ali, Kurisito gaatufiiririra.

<sup>9</sup> Obanga ohufa hwa Yesu hwatuleetera ohutubala ohuba abagwalaafu, saaja hutunonola olu Hatonda aligudya abaatu n'ehiruni ehy'amaani? <sup>10</sup> Olwohuba ni njaali ni njahiirino ehihooli ngati weefe ni Hatonda, Yesu Omwana wuwe ni gafa, ohufa huhwe hwatufaanania ni Hatonda. Ohufa huhwe ni huhenire ohutufaanania ni Hatonda, hulinonoha olw'ohulamuha huhwe! <sup>11</sup> Si c'ehyo hyonene aye husanalya n'ohusanalya olwa Musengwa weefe Yesu Kurisito agira ni huli



n'omuhumba ni Hatonda olw'ohutufaanania ni naye.

### *Kurisito n'Adamu*

<sup>12</sup> Ehibi hyaja mu hyalo olw'ohubbenga hw'omuutu omudaayi, era n'ohufa hwosi hwaja olw'ehibi hy'omuutu oyo. Olw'ehyo ohufa nga humaamira abaatu bosibosi, olwohuba bosibosi baabbenga.\* <sup>13</sup> Hatonda ko aye Musa amagambi, ehibi hyali hihenire ohuuja mu hyalo. Aye amagambi ni ganumaŋo ŋanuma ananga ohugabbwaga. <sup>14</sup> Atenga ohunwa hu Adamu ohwolera erala hu mulembe gwa Musa, abaatu beyongera ohufa ni hinjiramo ni naabo abatabbenga olw'ohubbwaga egambi lya Hatonda hy'Adamu. Era Adamu mu ngeri eyindi, gaali hyahuboneraho hya Yesu oyu baali ni bahuumiirira ohuuja. <sup>15</sup> Aye ehirabo hya Hatonda, ni-hyo hyanjabulo sihiri mwisa erala n'ohubbenga hw'Adamu. Olwohuba ng'olu ohubbenga hw'omuutu omulala oyo Adamu hwaleetera bangi ohufa, era ni Hatonda aya abaatu bangi ehirabo hy'obulamu olw'ehisasabirisi hihye n'abasoniŋa ebibi n'abita mu muutu omulala oyo Yesu Kurisito. <sup>16</sup> Nindi ehirabo hya Hatonda ehyo sihiri hy'ohufa ohwaja olw'ehibi hy'Adamu ehyaaleetera abaatu bosibosi ohubasalira omusango. Aye ehirabo hihye ehyo hyaleetera bangi ohwejeerera omusango. <sup>17</sup> Ohubbenga hw'Adamu hwaleetera abaatu ohufa. Aye

---

\* 5:12 5:12 Tand 3:6

olw'ehisasabirisi hya Hatonda ehibilitirifu, ababala ohuba abagwalaafu era basuna obulamu obutanwano ni babita mu Yesu Kurisito.

<sup>18</sup> Ng'olu Hatonda gasalira abaatu bosibosi omusango olw'ehibi hy'Adamu, mu kola nj'enyene ohufa hwa Yesu\* hunweramo bosibosi ohubabala ohuba bagwalaafu era basuna obulamu obutanwano. <sup>19</sup> Ng'olu Adamu gajeema galeetera bangi ohufuaha babbengi mu moni ja Hatonda, n'obugondi wa Kurisito ohufa hu musalabba hireetera bangi ohubabala ohuba bagwalaafu.

<sup>20</sup> Hatonda gatajo amagambi gayeede abaatu ohumanya baati babbengi. Aye abaatu aya baahoma ohubbenga ni Hatonda yeesi peyi gahoma ohweyongera ohubanjambira ehisasabirisi. <sup>21</sup> Ng'olu ehibi hyanweramo abaatu ohufa, n'ehisasabirisi hya Hatonda hiityo panahyagama ohuleetera bangi ohubabala ohuba bagwalaafu. Hino hyabaleetera ohusuna obulamu obutanwano ohubita mu Yesu Kurisito Musengwa weefe.

## 6

*Huli hy'abafu eyiri ehibi aye balamu olwa Kurisito*

<sup>1</sup> Naahani hulome huutye? Hweyongere ohuhola ebibi ko Hatonda geyongere ohutanjambira ehisasabirisi? <sup>2</sup> Kadi nanadiidiri. Efe huli hy'abafu eri ebibi, hunanga huutye

---

\* **5:18** 5:18 Ebbayibbuli ejindi jiroma jiiti ehikolwa ehy'obugwalaafu.

ohubigobolera nindi? <sup>3</sup> Simumanyire muuti ni hwabatiziwa, hwabatiziwa ohulaga ti hwingira mu muhumba ni Yesu Kurisito, era hwaba hy'abafiira njalala ni naye? <sup>4</sup> Ni batubatiza hwali hy'abafuuye batusiha ni Kurisito, ko hibe ti ng'olu Semwana gamulamusa n'obunangi buwe, hwesi huutyo hwambale obulamu obunyaaha.\*

<sup>5</sup> Ale hanye ni batubatiza hwenimba ni naye mu hufa, ananuma hubuusabuusa hwesi huja hulamuha hya niye. <sup>6</sup> Humanyire huuti obulamu obuhwalimo owanembanga ohuhola ehibi babuhomerera hu musalabba njalala ni Kurisito ko hutagobolayo ohuba abeedu b'ehibi. <sup>7</sup> Olwohuba omuutu anafa aba gejeereeye, ehibi sihimunuga. <sup>8</sup> Olw'ehyo, ni huba ni hwafiira njalala ni Kurisito, huli n'ohufugiirira huuti huliba balamu ni naye. <sup>9</sup> Olwohuba humanyire huuti ng'olu Hatonda galamusa Kurisito, saalifa nindi era ohufa sihuhimunuga. <sup>10</sup> Gaafa mulundi mulala olw'ebibi by'abaatu era sahigobolayo hufa nindi aye naahani mulamu njalala ni Hatonda. <sup>11</sup> Mu ngeri nj'enyene mwesi mwebone hy'abafu eyiri ehibi, aye abalamu mu bulamu obunyaaha mu Yesu Kurisito. Ehyo hiyeesa Hatonda enono.

<sup>12</sup> Olw'ehyo, mutaganyanga ehibi ohubanuga ko mutagondera ohwegomba hw'emibiri jenywe. <sup>13</sup> Era mutanangayo ebitundu by'emibiri jenywe eyiri ehibi, aye hy'abaatu abaali ni bafuuye balamuha baaba n'obulamu obunyaaha, mwenjeereyo erala eyiri Hatonda,

---

\* 6:4 6:4 Kol 2:12

abatambisenga ohuhola ebyo ebisaana.  
 14 Ehibi hitabanjuganga olwohuba simuli  
 ŋaasi w'obunjugi wa magambi aye muli ŋaasi  
 w'ehisasabirisi hya Hatonda.

*Hufuuhe beedu b'ebyo ebi Hatonda asiima*

15 Olwo ŋaahani huhole hi? Hwegumye  
 ohuhola ehibi olwohuba sihuli ŋaasi  
 w'amagambi aye w'ehisasabirisi hya Hatonda?  
 Kadi nanadiidiri! 16 Simumanyire muuti singa  
 oba wenjayeeyo ohuba omwidu w'omuutu  
 ahunuge era hiityo po hiba? Olw'ehyo hiri eyi  
 muli ohusalano ohugondera ehibi ehireeta ohufa  
 oba ohuba abagondi hibafuule ohuba abasaana  
 eyiri Hatonda. 17 Cooka hweyaasa Hatonda  
 olwohuba wayire mwalinga beedu b'ehibi,  
 mwanjulira era mwafugiirira n'omwoyo mulala  
 ebi babasomesa. 18 Ŋaahani bababonolola  
 mu maani g'ehibi era mwafuuha banjeeresa  
 ba Hatonda ohuhola ebi asiima. 19 Bino  
 mbiroma ni tambisa ebibono ebinamba hu  
 huhola owiidu olwohuba hyangu ohubitegeera.  
 Ng'olu mwenjerangayo erala ohuhola ebibi,  
 mwenjeereyo erala muutyo ohuholanga ebirani  
 ebiraga biiti muli bagwalaafu.

20 Ni mwali ni muhiiri beedu b'ehibi, mwali  
 mwetaaya ni mutananga ohuhola ebi Hatonda  
 asiima. 21 Hiranji hi ehi mwasuna mu huhola  
 ebyo ebi banjamba esoni ŋaahani? Ebiitu  
 ebyo binjwamo ohufa. 22 Aye ŋaahani ng'olu  
 Hatonda gababonolola mu wiidu eyiri ehibi  
 era mwafuuha hy'abeedu eyi ali. Hino hi-  
 banjweramo obugwalaafu hyabaleetera obulamu

obutanwanjo. <sup>23</sup> Ohufa nj'omuhemba ogubanja omuutu ahola ehibi, aye obulamu obutanwanjo nj'ehirabo ehi Hatonda agaba ohubita mu Yesu Kurisito Musengwa weefe.

## 7

### *Obufumbo ng'ehy'ohuboneraho*

<sup>1</sup> Aboluganda, ehi nenda ohulomaho hiri mu magambi aga mufaania. Simumanyire muuti amagambi ganuga omuutu n'ahiiri mulamu? <sup>2</sup> Ehy'ohuboneraho, omuhasi omufumbo, wamwe amunuga n'ahiiri mulamu. Aye wamwe anafa, egambi ly'obufumbo liba sirihinuga muhasi oyo. <sup>3</sup> Olw'ehyo, omuhasi anafumbirwa omusinde owundi wamwe ola n'ahiirino, omuhasi oyo aba muhwedi. Aye wamwe anafa, egambi eryo liba sirihimuwoja. Era singa afumbirwa omusinde owundi, ayo saaba n'aholire obuhwedi.

<sup>4</sup> Aboluganda, pohiri hiityo n'eyiri enywe mwesi. Mwejeerera amagambi ohubanuga olu mwafiira njalala ni Kurisito. Olwohuba muli bimesu by'omubiri gwa Kurisito era ni gafa hu musalabba mwesi mwafa. Olw'ehyo, njaaahani muli b'oyo owalamuha ko munange ohuhola ebirani ni munjeeresa Hatonda. <sup>5</sup> Aye ohwegomba hw'omubiri ni hwali ni huhitunuga, amagambi ganeerereranga omwoyo ohwegomba ohuhola ebibi ohwo hwatambisa emibiri jeefe, nga huhola ebitwosa hu hufa. <sup>6</sup> Aye njaaahani ohwema olu hwafiira njalala ni Yesu hu musalabba era sihuhiiri njaaasi w'amagambi ago agaali ni gatuwoonjire. Batwejeeresa obusibe

w'amagambi huŋange ohuŋeeresa Hatonda mu kola epyaha ni hubita mu Mwoyo Omutukuvu, ekola eyitali yira ekale ey'ohugenderanga mu magambi aga baŋandiiha.

### *Amagambi n'ehibi*

<sup>7</sup> Olwo ŋaahani hulome huuti amagambi mabi? Kadi naŋadiidiri! Olwohuba hu lwange aŋaŋuma magambi sinahamanyire ehibi nj'ehiina. Ni ŋahatabaayeno egambi eriroma liiti, "Siwegombanga hiitu hyabeene." Sinahamanyire ti ohwegomba ehyabeene hibi.\* <sup>8</sup> Aye ehibi hyatambisa ekabi ohuŋwa hu gambi eryene eryo, hyandeetera ohwegomba ohwa hiisi ngeri. Olwohuba aŋaŋuma magambi ehibi sihiba n'obulomere. <sup>9</sup> Ni naali ni kiiri hufaaniana ehi amagambi galagira, naali ndibulani. Aye ni nagategeera, ng'ehibi hyeta aŋalafu, <sup>10</sup> era nga ko faania ti egambi eryali eryohunjeeda sune obulamu, mu butuufu lyali lipira mu hufa. <sup>11</sup> Olwohuba ehibi ni hyasuna ekabi ey'ohundulinga ni hibita mu hiragiyo, nga hindeteera ohufa.\* <sup>12</sup> Wayire hiri hiityo amagambi nigo mawufu era n'ebiragiyo byosi byabufu, bituufu era birani. <sup>13</sup> Naahani hulome huuti amagambi malani nindi nj'agapweramo ohufa? Kadi naŋadiidiri. Aye ehihulu hiri hiiti ehibi ko hibonehere erala hiiti hibi, hitambisa ehirani ohupweramo ohufa.

### *Ohuŋiriŋana n'ehibi mu bulamu w'omuutu*

---

\* **7:7** 7:7 Hun 20:17      \* **7:11** 7:11 Tand 3:13

14 Humanyire huuti amagambi ganwa ewa Hatonda, aye neyagaana ni kolire eby'omubiri era ndi mwidu w'ehibi. 15 Ehi kola sikitegeera olwohuba ehi nenda ohuhola si c'ehi kola aye neyagaana ni kolire ehi tenda kole. 16 Mu ngeri eyi kola ehitahendire kole, hindeetera ohufugiirira ti amagambi nigo malani. 17 Aye puma ngeri yosiyosi olwohuba ehibi ehiri mu ese nj'ehigira ni kola ehitahendire kole. 18 Manyire ti mu ese puma hiraŋi hyosihyosi, olwohuba ng'omuutu wayire nenda ohuhola ehiraŋi, sipanga huhihola. 19 Olwohuba ehiraŋi ehi nenda ohuhola si c'ehi kola aye neyagaana ni kolire ehibi ehitahendire kole. 20 Naahani nimba ni kola ehi tahendire kole, sindiise aba nahiholire aye ehibi ehiri mu ese.

21 Olw'ehyo, neyagaana ehyo ni hiri nj'ehindiho. Nimba ni nenda kole ehiraŋi neyagaana ehibi ni hiri nj'ehyetaayeŋo. 22 Cooka mu mwoyo gwange sangaalira amagambi ga Hatonda. 23 Aye mu mubiri mbona egambi ery'enjabulo ni litamba era ni liŋirinaŋia egambi lya Hatonda mu biŋeego byange, hino hindeteera ohuhola eby'omubiri. 24 O, nga mbweneweene! Nj'ani alinonola mu mubiri guno ogwijuuye ehibi era oguupira mu husihiiriha? 25 Neyaasa Hatonda olwohuba mu Yesu Kurisito Musengwa weefe, punuha ohuŋwa mu higosi hino!

Naahani po ndi tyo. Mu mwoyo gwange ne-manyire ti ndi n'ohuhola ehi gambi lya Hatonda liroma, aye omubiri gupalula gwapira ohuhola

ebi ehiragiyo hy'ohuhola ehibi hiroma.

## 8

### *Obulamu ow'omuutu oyu Omwoyo Omutukuvu atangirira*

<sup>1</sup> Nahani abaatu abali mu Yesu Kurisito, banjuma musango <sup>2</sup> olwohuba mu Yesu Kurisito, Mwoyo gaapa\* edembe era ehibi n'ohufa sibihinjuga bulamu wange. <sup>3</sup> Amagambi gaali siganjanga hutunonjola olw'ohwegomba hw'omubiri. Aye Hatonda gatuma Omwana wuwe naali n'omubiri hy'ogwomuutu ko ahene anjangule ehibi ehi magambi gaali ni gatanjanga huhola olw'ohwegomba hw'omubiri. <sup>4</sup> Yesu Kurisito gahihola, ko efe aba ohwegomba hw'omubiri hutatangirira aye Omwoyo Omutukuvu nj'atutangirira, hwahoheresa ebi magambi gatulagira. <sup>5</sup> Abo aba ohwegomba hw'omubiri hunjuga, banjamba hu hola eby'omubiri, aye abo aba Omwoyo Omutukuvu anjuga, banjamba hu hola ebi asiima.

<sup>6</sup> Ohunjamba ohuhola ebi mubiri gwegomba hihwosa hu hufa. Aye onahola ebi Omwoyo Omutukuvu asiima, oja husuna emiyaaya n'obulamu obutanwanjo. <sup>7</sup> Omuutu oyu hwegomba hw'omubiri hunjuga aba mulabe eyiri Hatonda era saanjanga hugondera magambi gage. <sup>8</sup> Abo aba ohwegomba hw'omubiri hunjuga sibanjanga husangaasa Hatonda.

---

\* **8:2** 8:2 Ebbayibbuli ejindi jiroma jiiti Mwoyo gahunja.



<sup>9</sup> Omwoyo wa Hatonda n'aba n'amenyire mu nywe, ŋaahani nj'obanuga sosi ohwegomba hw'omubiri. Era oyo anuma Omwoyo wa Kurisito mu bulamu wuwe, si wuwe. <sup>10</sup> Kurisito n'aba n'amenyire mu bulamu wenywe, wayire emibiri jenywe jinahafe olw'ehibi, aye Omwoyo abanja obulamu olwohuba Hatonda ababala ohuba abagwalaafu. <sup>11</sup> Hanye Omwoyo wa Hatonda owalamusa Yesu Kurisito amenyire mu bulamu wenywe, mwesi alibalamusa.

<sup>12</sup> Olw'ehyo ŋaahani balebe mu Kurisito, huli n'ebanja. Aye ohwegomba hw'omubiri sinje ohutubanja ohuhola ebigwenda. <sup>13</sup> Ohululuhanira ohuhola ebi hwegomba hw'omubiri gwenda hireeta ohufa. Aye Omwoyo anabaja amaani mwanjangula ehibi, muba n'obulamu obusangaasa Hatonda. <sup>14</sup> Olwohuba abo aba Mwoyo wa Hatonda alunamy, nj'abaana babe. <sup>15</sup> Omwoyo oyu Hatonda gabaŋa saabaleetera obuti aye gabafuula abaana babe, era huli n'obugumu ohulanga Hatonda huuti "Bbaabba."\* <sup>16</sup> Omwoyo wuwe omwene atuhahasa mu myoyo j'efe ati huli baana ba Hatonda. <sup>17</sup> Ni huba ni huli baana babe, hulisuna ebyo ebi gasuubisa abaatu babe, era hulisunira ŋalala ni Kurisito ebi Hatonda gamutegehera. Ni hubonaabonera ŋalala ni Kurisito, balitunjeera ŋalala enono ni naye.

### *Enono eri hunahabe ni nalyo*

---

\* **8:15** 8:15 Mar 14:36; Bag 4:6

18 Mbona ng'ebiguudyo ebi hubitamo hatyane, sihunanga hubigeragerania n'enono eri Hatonda alituna. 19 Ebitonde byosibyosi bihumire era ni byesunga ohwola hu ludaalo olu Hatonda alihwehulayo abaana babe. 20 Ebitonde sibyeendeeye ohutoheresa ehigendererwa hya Hatonda aye omwene nj'owasalaño bibe biityo.\*

21 Ebitonde ebyo bisuubira ohubinunula mu hufa olu Hatonda aliña abaana babe enono n'edembe.

22 Humanyire huuti ebitonde byosibyosi ohwola hatyane bibinda n'obulumi hy'omuhasi alumwa ohusaala. 23 Sibitonde byonene, aye ni neefe abaasuna Omwoyo Omutukuvu ng'ehirabo ehi Hatonda atagihiraho ohutuna.

Hwesi hubinda mu myoyo jeefe n'obulumi. Hwesunga era huhuumirira Hatonda ohutununula atune emibiri ejitafa ohulaga ng'olu huli baana babe. 24 Ng'olu gatunonola, hwesunga era husuubira ohutununula. Aye ehi osuubira onaba n'ohibonaho, ohwo sihuba husuubira nanadiidiri. Nj'ani asuubira ehyo ehi aba n'anambire mu ngalo? 25 Aye ni husuubira ohusuna ehi hutabonaho, huhuumirira n'ohwehaliriha.

26 Mu ngeri nj'enyene, Omwoyo Omutukuvu atuyeeda mu budoto weefe ow'ohutamanya husaba bulani. Aye Omwoyo omwene oyo atulombera n'ohubinda mu ngeri eyi otananga huloma n'ebibono. 27 Hatonda oyo abona emyoyo j'abaatu, amanyire Omwoyo ehi aba n'atulombera efe abafugirira.

---

\* 8:20 8:20 Tand 3:17-19

<sup>28</sup> Humanyire huuti mu hiisi hiitu ehitwolaho, Hatonda agira efe abamwenda hyatunweramo ehiraŋi ng'olu husiima huhwe huli. <sup>29</sup> Ko Hatonda atonde ehyalo, gamanya abaatu babe era gabalanga gahena gatobola ni genda bafaane n'Omusaani wuwe, ko Omusaani wuwe oyo ahene abe omudaayi mu balebe eduuli. <sup>30</sup> Abo aba Hatonda gatobola gahena gabalanga era gababala ohuba abagwalaafu ng'abaŋa n'edaala ery'eŋono.

*Ohwenda hwa Hatonda mu Yesu Kurisito*

<sup>31</sup> Naahani ehyo hunahiromeho hi? Hatonda anaba hu lubega lwefe, nj'ani aŋanga ohutunjirirania gatunanga? <sup>32</sup> Hatonda owanayo Omusaani wuwe ohufa hu lwefe hwesihwesi, olw'ehisasabirisi hihye saalituŋa ebiitu byosibyosi ebihwenda? <sup>33</sup> Nj'ani aliŋaŋabira aba Hatonda gatobola? Mbona ti Hatonda omwene oyo nj'obabala ohuba abagwalaafu. <sup>34</sup> Nj'ani alibasalira omusango? Eŋuma wayire mulala. Olwohuba Yesu Kurisito owaafa era galamuha gehaaye mu hifo ehy'eŋono hu lubega lw'omuhono omulungi ogwa Hatonda atunoherehesa. <sup>35</sup> Naahani nj'ani aŋanga ohutwabuhania ni Kurisito galeheraŋo ohutwenda? Huba n'ebigosi oba baatu hutuhiyaania, huŋuma hyahulya oba hugenda majula, baatu hu tutisatiisa oba hwenda hutwita? <sup>36</sup> Ng'olu hyaŋandiihiwa hiiti;  
 “Hiisi ludaalo batwehoyera ohutuhenano  
 hu lulwo.

Batubisya hy'etaama eyi baja husala.”\*

<sup>37</sup> Aye mu ebyo byosibyosi, huli n'obuñangusi ow'amaani olwa Yesu Kurisito atwenda.

<sup>38</sup> Kahahisa erala ti wayire ohufa oba huba mulamu, bamalayika oba emisambwa, ebiriño hatyane oba ebiribaño mu moni eyo, wayire amaani g'emisambwa <sup>39</sup> agaholera ñamugulu mu bbanga oba ñaasi hu hyalo oba ehitonde hyosihyosi, sibinanga hututusaho hwenda ohu Hatonda atwenda mu Yesu Kurisito Musengwa weefe.

## 9

### *Hatonda gatobola Abayisirayiri*

<sup>1</sup> Ndoma amazima mu Kurisito sindulinga, n'Omwoyo Omutukuvu gakahasa mula mu mwoyo gwange ati ehi nja huloma hituufu.

<sup>2</sup> Ndi n'ohunyolwa hungi hu mwoyo gwange olw'Abayudaaya bahyange. <sup>3</sup> Era nahendire mbe ndiise ofuuha ehy'embihho era omusuule eyiri Kurisito ni hiba ni hireetera abalebe bange abegwanga lyange abo ohunoñoha.

<sup>4</sup> Abalebe bange Abayisirayiri abo, mbaba Hatonda gaña ekabi ohuba abaana babe, mbaba gabonehera baabona eñono lirye n'emoni jaawe, mbaba gahola ni nabo endagaano. Mbaba gañambya amagambi gage gaahena gabalegera n'engeri ey'ohumujumiryanga mu Yekaalu era mbaba gaña ebisuubise ebinamba hu bunoñosi.\* <sup>5</sup> Nibo nj'abanwa mu lulyo lw'abahale omu ebiha by'abaatu bosibosi bisimuha. Ni Kurisito oyu

\* **8:36** 8:36 Zab 44:22 \* **9:4** 9:4 Hunj 9:4

basaaye hy'omuutu osimuha mu lulyo lwawe ate nje Hatonda aṅuga byosibyosi oyu banajumiryenga emirembe n'emirembe. Amiina.

<sup>6</sup> N'aloma tyo sihitegeesa hiiti Hatonda si-gooheresa ebi gabasuubisa olwohuba sihiisi abanṅwa mu lulyo lwa Yisirayiri bosibosi oti baatu ba Hatonda. <sup>7</sup> Wayire bamu lulyo lwa Yibbulayimu, sihitegeesa hiiti bosibosi bejuhulu babe, endiho. Aye hyanandiihiwa hiiti "Mu Yisaka nj'omwolisunira abejuhulu aba nahusuubisa."\* <sup>8</sup> Mu ngeri eyindi, abaatu ba Hatonda sinje abanṅwa mu lulyo lwa Yibbulayimu hyonene aye abo abafugiirira ehisuubiso hi-hye ng'olu Yibbulayimu gafugiirira ehi Hatonda gamusuubisa. <sup>9</sup> Malayika ni gaali n'abalomera ehisuubiso galoma ati, "Mu hiseera ehiragaane aṅa nahagobolere omwaha oguuja, Saala anaahabe asundya omwana omuseere."\*

<sup>10</sup> Si c'ehyo hyonene, omuhasi wa Yisaka oyu balanganga baati Labbeka gasaaye abaana. <sup>11</sup> Aye abaana abo ni baali ni bahiiri hubasaala, era ni bahiiri huhola ehiranṅi oba ehibi, <sup>12</sup> Hino hyali hiityo ko bahahase baati Hatonda atobola oyo oyu aba ni gendire n'atemire hu ebyo ebi aba n'aholire. Hatonda galoma Labbeka ati, "Omuhulu aja huba munṅeresu womunṅere."\* <sup>13</sup> Hyanandiihiwa hiiti, "Nenda Yakobbo aye nasuula Esawu."\*

<sup>14</sup> Naahani olwo hulome huuti Hatonda gehubbira? Kadi nanadiidiri. <sup>15</sup> Olwohuba

\* **9:7** 9:7 Tand 21:12 \* **9:9** 9:9 Tand 18:10 \* **9:12** 9:12 Tand

25:23 \* **9:13** 9:13 Mal 1:2-3

Hatonda omwene galoma Musa ati, “Ese saasira oyo oyu mba ni nendire ohusaasira era naṅambira ehisasabirisi oyo oyu mba ni nendire ohuṅambira ehisasabirisi.”\*

<sup>16</sup> Olw’ehyo, Hatonda saṅambira muutu yesiyesi ehisasabirisi olw’ohwefaaho oba olw’ebikolwa ebi aba n’aholire, aye omwene nj’osalajo ow’ohuṅambira ehisasabirisi.

<sup>17</sup> Ehyaṅandiihiwa hiroma Falaawo hiiti, “Nahuhusa nahuṅa obuhulu olw’ohwenda ohulaga amaani gange mu ewe era ng’olu ndi n’obuṅangi mu hyalo hyosihyosi.”\* <sup>18</sup> Olw’ehyo, Hatonda asaasira oyo oyu aba ni gendire ohusasira era ahahadasa omwoyo gw’oyo oyu aba ni gendire ohuhadasa.

### *Ehiruṅi n’ehisa hya Hatonda*

<sup>19</sup> Naahani ṅangire ohuloma oti, “Obanga pohiri hiityo, lwahiina Hatonda atunenya? Nj’ani aṅanga ohuṅahania ehi aba ni gendire ohuhola?” <sup>20</sup> Aye ewe omuutu obuutu, ndiiwe ani ohubuusa Hatonda hu kola yiye?

Ehiwumbe obuwumbe hiṅanga hiitye ohubuusa owahiwumba hiiti, “Lwahiina wamumba oti?”

<sup>21</sup> Omuwumbi saaba n’ehiyale ehy’ohuwumba hyosihyosi ehi aba ni gendire mu hitole hy’eroba lirye? Mwiropa nderyene saṅanga husalajo gawumbamo ebyohutambisa ebitula aṅa naṅa n’ebitula olubalira?

<sup>22</sup> Ni Hatonda yeesi c’ehi ahola. Gendire ohulaga ehiruṅi ehibitirifu n’amaani gage eyiri

---

\* **9:15** 9:15 Huṅ 33:19 \* **9:17** 9:17 Huṅ 9:16

abo aba gaali n'aja ohusihiirisa aye gabehali-iriha. <sup>23</sup> Hino gahihola ni genda ohulaga enono lirye ebitiirifu eyiri abo aba galitegeehera ohunwa ahale nahale era abanambira ehisas-abirisi. <sup>24</sup> Abaatu abo ko ndiife aba galanga, simu Bayudaaya boonene aye n'Abatali Bayudaaya. <sup>25</sup> Ng'olu Hatonda omwene aloma mu hitabo hya Kosiya ati,

“Abatali baatu bange,  
ndi balanga baatu bange.  
Abaatu abaali abasuule,  
ndi balanga bahoda.\*

<sup>26</sup> Mu hifo ehyene ehyo omu babalangira baati,  
'Simuli baatu bange'  
nj'omu banahabalingirire baati,  
'Abaana ba Hatonda omulamu.' ”\*

<sup>27</sup> Ni Yisaaya galira Yisirayiri amangi ati,  
“Wayire Abayisirayiri bangi bali hy'omujehe ogw'ohunyanja ogutabaliha, abanahanonjohe banaahabe badiidiri beene. <sup>28</sup> Olwohuba Hatonda Musengwa ananuma hwemoota anahasalire abaatu omusango era abagudye ananuma hubagoboleramo.”\* <sup>29</sup> Era Yisaaya omwene oyo gaaloma ati, “Singa Musengwa Omunugi w'ebiitu byosi sigatuleherahuno abaatu abolulyo lwefe, hani hwasihiiriha hy'abaatu abomu bibuga Gomora ni Sodoma.”\*

*Ohutafugiirira hw'Abayisirayiri*

<sup>30</sup> Naahani hulome hiina? Hatonda gabala Abatali Bayudaaya abetefuuyeho ohwendula

\* **9:25** 9:25 Yis 29:16; 45:9 \* **9:26** 9:26 Kos 1:10 \* **9:28** 9:28  
Yis 10:22-23 \* **9:29** 9:29 Yis 1:9

ohuba abagwalaafu olw'ohumufugiirira, <sup>31</sup> aye Abayisirayiri abagesyaho ohuba abagwalaafu olw'ohuhuuma amagambi, sibabusuna. <sup>32</sup> Ne lwahiina sibabusuna? Sibabusuna olwohuba sibabwendulira mu ngira ey'ohufugiirira wabula babita mu bikolwa byawe. Ehyo hya-baleetera ohwegumula hu oyo ali "hy'ebaale eri begumulaho." <sup>33</sup> Ng'olu hyanandiihiwa hiiti; "Bona taaye ebaale mu Sayuuni, ebaale egumu erireetera abaatu ohwegumula, olwanda oluja hubaleetera ohwehubbirano omunyiha. Era hiisi amwesiga saanahaswale."\*

## 10

<sup>1</sup> Aboluganda, ehi mwoyo gwange guṅembaho bugali era ehi saba hiri hiiti Abayisirayiri banonohe. <sup>2</sup> Manyire ti bafubaho ohuṅa Hatonda enono aye simukola endani. <sup>3</sup> Sibamanyire engeri ey'ohusanamo obugwalaafu ohuṅwa ewa Hatonda aye bagesyaho ohusegano engira yaawe hu waawe ohuba bagwalaafu. <sup>4</sup> Kurisito gooheresa ehigendererwa hy'amagambi ko hiisi amufugiirira bamubale ohuba mugwalaafu.

*Obuhwenda ow'ohunonoha eyiri abaatu bosi-bosi*

<sup>5</sup> Musa ganandiiha ati omutu anegumyenga ohwoheresa amagambi n'ebiragiyo anabengano olw'ohubyoheresa.\* <sup>6</sup> Aye obugwalaafu obuujja olw'ohufugiirira, omutu sigebuusa ati, "Nj'ani

\* **9:33** 9:33 Yis 28:16 \* **10:5** 10:5 Leev 18:5



anahatiine mwigulu atuseyo Kurisito amuleete hu hyalo atuyeede?” <sup>7</sup> Oba ohwebuusa ati, “Nj’ani alitiina e magombe atuseyo Kurisito ohujwa mu bafu?” <sup>8</sup> Naahani obuhwenda obujamba hu bugwalaafu obu muutu asuna olw’ohufugiirira buli buuti, “Ehibono hya Hatonda hiri huupi ni neewe. Hiri mu hanwa nomu mwoyo gugwo.” Ehyo nj’ehibono ehi hubuulira abaatu. <sup>9</sup> Singa waatula n’omunwa gugwo oti Yesu nje Musengwa n’otayeho n’ohufugiirira mu mwoyo gugwo oti Hatonda gamulamusa mu bafu, ononjoha. <sup>10</sup> Olwohuba omuutu afugiirira n’omwoyo gugwe ko bamubala ohuba omugwalaafu era ohunonjoha, geyatulira n’omunwa gugwe omwene ati anonjohire.

<sup>11</sup> Ng’olu ehyanandiihiwa hiroma hiiti “Hiisi amwesiga saanahaswale,”\* <sup>12</sup> Ejuma njabulo njagati bw’Omuyudaaya n’Atali Muyudaaya. Hatonda nje Musengwa ya bosibosi era agaba ekabi abo bosibosi abamusaba. <sup>13</sup> Era hyanandiihiwa hiiti; “Hiisi aliranga Musengwa n’amusunga ohumunonjola, ali munonjola.” <sup>14</sup> Aye basunga baatye oyo oyu bahiiri hufugiirira, ohubanonjola? Era banjanga baatye ohumufugiirira ni bahiiri hunjulirangaho ebi munjambaho? Nindi banjanga baatye ohujulira ebimunjambaho ni njajuma muhwenda obalomeeye? <sup>15</sup> Era abahwenda batiina baatye ohubalomera ni njajuma obatumire? Hyanandiihiwa hiiti, “Nga hirañi abaatu abatulomera Amanjuliro

---

\* **10:11** 10:11 Yis 28:16

Amalaŋi ohutuhyalira!”\* 16 Aye abaatu bosibosi sibafugiirira Amaŋuliro Amalaŋi ago. Yisaaya aloma ati, “Musengwa, nj’ani afugiirira obuhwenda weefe?”\* 17 Ohufugiirira huuja olw’ohuŋulira Amaŋuliro Amalaŋi agaŋamba hu Kurisito. 18 Aye hambuuseho, mu butuufu sibaŋuulira buhwenda obwo? Ehituufu hiri hiiti baŋulira, ng’olu ehyaŋandiihiwa hiroma hiiti; “Amajaŋjaasi gaawe gaŋulirihana mu hyalo hyosihyosi, era n’ebibono byawe hiisi muutu gabiŋulira.”\*

19 Nindi hambuuse, Abayisirayiri sibategeera? Bategeera. Musa omwene galoma ati, “Nja hubaleetera ohugongeera olw’abaatu aba muŋeega muuti mbo baŋuma punga yiita hiswa, nja hubaleetera ohuluŋa olw’abaatu abanubeebe.”\*

20 Era Yisaaya n’obugumu gaaloma ati, “Abo abatanyendulangaho baahena bambona. Era nehwehulira abo abaali ni baatasungire.”\*

21 Aye ehiŋamba hu Yisirayiri aloma ati, “Nahena eteŋama ey’amaani ni nangirisa abaatu abajeemu baaje eyi ndi aye bageene.”\*

## 11

### *Ehisa hya Hatonda eyiri Abayisirayiri*

---

\* **10:15** 10:15 Yis 52:7 \* **10:16** 10:16 Yis 53:1 \* **10:18** 10:18  
 Zab 19:4 \* **10:19** 10:19 Mag 32:21 \* **10:20** 10:20 Yis 65:1  
 \* **10:21** 10:21 Yis 65:2

<sup>1</sup> Naahani hambuuseho, kaho Hatonda gahubba Abayisirayiri omugongo? Kadi nanadiidiri. Ese aloma ono, ndi Muyisirayiri omwjuhulu wa Yibbulayimu ohunwa mu hiha hya Bbenjamini. <sup>2</sup> Hatonda sigahubba abaatu babe abo omugongo, abagatobola ko ahene atonde ehyalo. Simumanyire ehyanandiihiwa ehiroma hu Eriya ng'olu galoma hu Bayisirayiri ati, <sup>3</sup> "Musengwa, beetire abanaabbi babo era babbwagabbwaga ebituuti bibyo ohubaŋeera enongo. Ndiise osigaaye era keesi bali hupiima benda bakenejo."\* <sup>4</sup> Aye Hatonda gamugobolamo atye? Gamuloma ati, "Ndiŋo n'abaatu kasanvu abageene ohusenga Bbaali."\* <sup>5</sup> Era pohiri nomu ndaalo jino. Naliŋo badiidiri beene aba Hatonda gatobolamo olw'ehisasabirisi hihye. <sup>6</sup> Hatonda naaba ni gabatobola olw'ehisasabirisi hihye, ehyo hiba hitegeesa hiiti sigabatobola olw'ebikolwa byawe ebiraŋi. Hiba ni hyali hiityo, ehisasabirisi hihye hyahali sihyihiiri hisasabirisi. <sup>7</sup> Naahani Abayisirayiri bendire Hatonda ohubabala ohuba abagwalaafu olw'ohuhuuma, amagambi aye sibahisuna ohutusaho abo abagatobola. Abandi baali n'emyoyo emihahadafu. <sup>8</sup> Ng'olu hyanandiihiwa hiiti, "Hatonda gabalehera obunubeebe ohubaŋuga. Gabana emoni aye sibabona, n'amatwi aye sibanjulira n'ohwola hatyane." <sup>9</sup> Ni habaha Dawudi galoma ati, "Leha ebiiŋulo byawe bibafuuhire omutego,

\* **11:3** 11:3 1 Bah 19:10,14      \* **11:4** 11:4 1 Bah 19:18

bibe ebaale ery'ohwegumulaho era  
ehy'ohwegalula.\*

<sup>10</sup> Leha emoni jaawe jiijeho olubooha  
batabona n'ohubona,  
n'emigongo jaawe  
jigodame emirembe n'emirembe.”

<sup>11</sup> Nindi hambuuseho, olwo Abayudaaya ni bageene ohufugiirira basihiirihira erala? Bbe, aye ohubbenga hwawe hyaleetera ab'Abatali Bayudaaya ohunojoha, ko hinweremo Abayudaaya abo ohugongeera. <sup>12</sup> Ohubbenga hwawe hwagira Abatali Bayudaaya basuna ekabi mbitirifu. Aye hija huba hibitiirifu Abayudaaya ni balifugiirira Kurisito.

### *Ohunojoha hw'Abatali Bayudaaya*

<sup>13</sup> Naahani handome ng'olu ndi muhwenda wenywe, obujeeresa wange eyiri enywe Abatali Bayudaaya bunesiimisa, <sup>14</sup> hamunga hyahaleetera abandi hu balebe bange Abayisirayiri ohunojoha. <sup>15</sup> Obanga Hatonda ohuhubba Abayudaaya omugongo hyafaanania Abatali Bayudaaya ni naye, hinahabe hiitye olu Hatonda alibasangalira olu baligobola eyi ali? Hiriba oti hani hulamuha. <sup>16</sup> Onaŋonga ehitole hy'etome ly'engaano eyiri Hatonda, hitegeesa hiiti etome eryo lyosiryosi liba lyawufu olwohuba olinongireeyo. Era n'ehiholo hy'omusaala onahinongayo, n'amasaga goosi gatiiniraho.\*

---

\* **11:9** 11:9 Zab 69:22-23 \* **11:16** 11:16 Etome ly'engaano n'ehiholo bitegeesa Yibbulayimu ni Yisaka ko ni Yakobbo.

<sup>17</sup> Aye singa amasaga ag'omusaala omuzayiti bagatemaho, baahena bajomehaho olusaga lw'omuzayiti ogwomwisugu, olusaga olwo luliisiwa n'ehiholo hira. Mu ngeri nj'enyene weesi Otali Muyudaaya njahani osuna omuganyulo nj'omwene hy'Abayudaaya.

<sup>18</sup> Kale ewe oli hy'olusaga olu bajomehaho obujomehe otatalanga hiholo olwohuba oli lusaga busaga.

<sup>19</sup> Aye onjanga ohuloma oti, "Amasaga ago bahena hugatemaho ko banjomehaho."

<sup>20</sup> Ehyo hituufu, aye bagatemaho olw'ohutafugiirira Hatonda. Enywe babajomehaho olw'ohumufugiirira. Kale mwejomehe, mutepaahapaaha.

<sup>21</sup> Olwohuba obanga Hatonda sigasaasira amasaga gala ameene hiholo, enywe ababajomehaho bujomehe mulinonera neena?

<sup>22</sup> Olw'ehyo mwegenderese, wayire Hatonda ali n'ehisasabirisi, abamujeemera abahambunjalira. Ali n'ehyere eyi muli singa mweyongera ohumwesiga. Aye ni munahamujeemere, mwesi anahabatemeho.

<sup>23</sup> Era Abayudaaya abo ni banahalehejo obujeemu wabwe, Hatonda anahabagoboleremo gabajomeha hu hiholo nindi.

<sup>24</sup> Enywe Abatali Bayudaaya muli hy'olusaga lula olw'omuzayiti ogwamera omwene bahena bagujomeha hu hiholo. Aye Abayudaaya nibo bali hy'omusaala omuzayiti ogubahoma huhoma. Olw'ehyo hyangu Hatonda ohubagobosa hu hiholo ng'olu baali oludaayi.

*Ehisa hya Hatonda eyiri abaatu bosibosi*

<sup>25</sup> Aboluganda, nenda mutegeere ehyama ehiŋamba hu Yisirayiri ko mutan̄eega muuti mubahira. Abayisirayiri abandi basigaaye bahahadafu b'emyoyo ohwola olu obungi w'Abatali Bayudaaya buliŋwayo ni bafugiirira Hatonda. Obuhahadafu w'emyoyo jaawe wahaseera buseera. <sup>26</sup> Ebyo ni biŋooye, Abayisirayiri bosibosi balinon̄oha, ng'olu hyaŋandihiwa hiiti; "Omunon̄osi aliŋwa mu Sayuuni, alitusa abejuhulu ba Yakobbo mu bibi byawe.\*

<sup>27</sup> Era yino nj'enahabe endagaano yange ni nabo, olu ndibasoniŋa ebibi byawe."\*

<sup>28</sup> Abayisirayiri abo balabe ba Hatonda olwohuba sibafugiirira Aman̄uliro Amalan̄i ko enywe muganyulwemo. Aye olwa basehulu baawe, bahoda eri Hatonda era gabatobola.

<sup>29</sup> Hatonda sacuusa bineego bibye eyiri abo abatobola gahena gabaŋa ekabi. <sup>30</sup> Ng'olu mwesi Abatali Bayudaaya ahale hale mwali bajeemu, ŋaahani Hatonda gabaŋambira ehisa-abirisi olw'obujeemu w'Abayudaaya. <sup>31</sup> Mu ngeri nj'enyene, ng'olu Hatonda gabaŋambira enywe ehisa, Abayudaaya boosi bajeemu ko Hatonda abaŋambire ehisa. <sup>32</sup> Olw'ehyo, Hatonda galeha abaatu bosibosi baaba mu bujeemu waawe hy'abasibe ko abaŋambire bosibosi ehisa.

---

\* **11:26** 11:26 Yis 59:20 \* **11:27** 11:27 Yer 31:33-34

<sup>33</sup> Nga Hatonda muṅinda! Eṅuma aṅanga ohutegeera amagesi n’ohumanya huhwe! Ebula otegeera ebi asalaṅo n’engeri eyi aholamo ebibye!\*

<sup>34</sup> Ehyaṅandiihiwa hiroma hiiti;

“Nj’ani amanyire

ehi Musengwa aṅeega?

Era nj’ani aṅanga ohumuṅa amagesi?\*

<sup>35</sup> Nj’ani owaali n’anjolireho Hatonda ehiitu hyosihyosi ko abe n’ebbanja eryohusasula?”\*

<sup>36</sup> Hatonda nj’owatonda ebiitu byosibyosi, nj’agira byabaṅo era birimuṅa eṅono. Abaatu bamuṅe eṅono emirembe n’emirembe. Amiina.

## 12

### *Engeri ey’ohuṅeeresamo Hatonda*

<sup>1</sup> Naahani balebe bange, mbegayirira olw’ehisa hya Hatonda, mumuṅe obulamu wenywe bube eṅongo endamu eyi bamutoboleeye era emusangaasa. Eyo nj’engeri etuufu ey’ohumujumirya. <sup>2</sup> Mutebisyanga hy’abaatu b’ehyalo hino, aye muganye Hatonda acuuse emyoyo n’epeega yenywe ko mufaanie ebi genda ng’olu biri ebirani, ebisangaasa era ebyolereeye.

<sup>3</sup> Olw’ehirabo ehi Hatonda gaapa olw’ehisasabirisi hihye, ndoma ti hiisi muutu hu enywe atebona ati nj’ohihenaho ate nga ko paanaṅo. Aye geṅeegengaaho mu kola endani era geheberenga ni geema hu

\* **11:33** 11:33 Yis 55:8 \* **11:34** 11:34 Yis 40:13 \* **11:35** 11:35  
Yob 41:11

hufugiirira ohu Hatonda gamuṅa. <sup>4</sup> Hiisi muutu ali n'omubiri mulala era ni guli n'ebimesu bingi, aye ebimesu ebyo byosibyosi sibitamba mulimo nj'omwene. <sup>5</sup> Mu ngeri nj'enyene, wayire nga huli bangi aye huli mubiri mulala mu Kurisito era hiisi muutu hu efe getaaga owahye. <sup>6</sup> Huli n'ebirabo byenjabulo ng'olu Hatonda gatunṅa olw'ehisasabirisi hihye. Singa omuutu aba n'ehirabo ehy'obunaabbi, atiine mu moni n'ohulomera abaatu ehibono hya Hatonda n'afugiirira ati ali humulomeramo. <sup>7</sup> Ni huba huṅeerese, afubenga ohuṅeerese n'omwoyo mulala, oba ohusomesa abaatu ba Hatonda, afubengaho ohubasomesa. <sup>8</sup> Oyo ali n'ehirabo ehy'ohugobosangamo abahye amaani, afubengaho ohuhihola. Ali n'ehyohugaba, agabenga n'omwoyo mulala. Ali n'ehyobunugi, anugenga nahenereye. Ni nooyo ali n'ehyohulaga ehyere, aholenga atyo naali musangaafu.

<sup>9</sup> Ohwendana hwenywe hubenga hw'amazima. Mwenjalenga ehibi era mwegumyenga ohuholera abaatu ebirani. <sup>10</sup> Mwendanenga hy'abalebe era hiisi muutu anjenga owahye enono. <sup>11</sup> Mubenga baheneerefu era muṅeerese nga Musengwa n'omwoyo mulala. <sup>12</sup> Esuubi eri muli ni nalyo libaleetere ohuba n'esangaalo, mwehalirihenga mu bigosi ebi mubitamo era mulombenga hiisi haseera. <sup>13</sup> Mubugulenga hu bimuli ni nabyo mwayeeda abafugiirira bahyenywe abanuma hyahwenjambaho era musangaalirenga abageni mu mago genywe.



<sup>14</sup> Mutabaŋwaba abo ababahiyaania aye mubasabirenga ekabi. <sup>15</sup> Musañalihisyenga ŋalala ni naabo abasaŋalya era mulirisenga abo ababa ni bali hulira. <sup>16</sup> Hiisi muutu amenyenga mu bulala n’abahye era mutehudumbasanga aye mube n’omuhago n’abaatu ab’edaala ery’añaasi. Mutañeeganga muuti mbo ndinywe omuhihenaho.

<sup>17</sup> Omuutu anahuhola ehibi, ewe otamwegalula. Muholenga ebi abaatu bosibosi basiima baati birañi. <sup>18</sup> Mufubenga ng’olu hiŋangiha ohuhola ebiitu ebireeta ohumenya mu miyaaya n’abaatu bosibosi. <sup>19</sup> Bahyange, mutegalulanga muutu yesiyesi abahola ehibi, aye muleherenga Hatonda omwene gaaba nj’obegalulira. Olwohuba Musengwa aloma mu hyaŋandiihiwa ati,

“Ohwegalula hwange, ndibesasula.”\*

<sup>20</sup> Ng’olu ehyaŋandiihiwa hiroma hiiti, “Enjala yinaba ni yiruma omulabe wuwo, omuŋanga ebiryo galya, era enduŋo yinaba n’emuluma, omuŋa amaaji ganywa.

Onahola otyo, anaahabe oŋeesa amanda ag’omuliro hu mutwe gugwe.”\*

<sup>21</sup> Ehibi hitabaŋangulanga aye muhiŋangule ni muhola ebirañi.

## 13

### *Muŋulirenga ababaŋuga*

---

\* **12:19** 12:19 Mag 32:35      \* **12:20** 12:20 Engero 25:21-22.

1 Mudembuhirenga abo ababanuga olwohuba obuñugi wosiwosi buñwa eyiri Hatonda. Era enjuma muñugi anuga, Hatonda n'atamutaayeno. 2 Olw'ehyo, hiisi agaana ohudembuhira abanugi aba ajemeeye ehi Hatonda gaataño era balimusalira omusango. 3 Abaatu abahola ebirañi sibatya batangirisi baawe aye abo abahola ebibi batya ohubebonesa. Wenda ohumenya mu miyaaya n'abatangirisi babo? Ale hola ebirañi ebi banugi benda era baja huhuñe enono. 4 Abanugi banjeeresa ba Hatonda hu lw'obulañi wenywe. Aye onaba n'ohola ebibi oli n'ohwenenderera olwohuba abanugi baliño ohugudya abo abahola ebibi. 5 Olw'ehyo, mubadembuhirenga, sirwohuty a ohubagudya hyonene aye olwohuba muhimanyire mu myoyo jenywe muuti hirañi ohubadembuhira. 6 Era ehyo c'ehigira ni musasula omusolo olwohuba abanugi banahola emirimo ejibagwene ohuhola baba banjeeresa Hatonda. 7 Musasulenga amabanja genywe, oba husasula omusolo oba epooza, ni hiba huñe muutu enono muli muñe.

### *Ohwendananga*

8 Mutabanga n'ebbanja lya muutu yesiyesi ohutusaho ebbanja ery'ohwendananga, olwohuba onenda owahyo oba woherehiise ehi amagambi galagira. 9 Amagambi galagira gaati, "Soholanga buhwedi, siwiitanga muutu wahyo, siwiibanga hiitu hyosihyosi, siwegombanga hiitu hyabeene," ko n'amagambi agandi gosigosi baganjimba lyaba erala lyonene eriroma liiti,

“Yendanga omuutu wahyo ng’olu weyenda wamwene.”\* <sup>10</sup> N’oba ni wenda owahyo, soonanga hu muhola hibi. Olw’ehyo onenda owahyo oba woheerehise ehi amagambi galagira.

<sup>11</sup> Hino muhiholenga ni mumanyire muuti ehiseera hitujoyeeho. Musisimuhe muṅwe mwiro esaawa yoolire, olwohuba ṅaahani ehiseera ehy’ohugobola hwa Musengwa weefe higereeye ohuhiraho aṅa hwatagihira ohufugiirira. <sup>12</sup> Owiire bunatere ohwanuuha. Hulehe ohuhola ebikolwa eby’ehiirema hwambale ebisoosa eby’obutangaafu. <sup>13</sup> Hwebisyenga bulani hy’abaatu abomumwi, sosi huṅwera mu binyumo nomu bumeesi nomu buhwedi nomu hwejabaata nomu huduhanaduhana ko n’egongi.

<sup>14</sup> Aye mwambale Musengwa Yesu Kurisito aṅuge obulamu wenywe ko mutoheresanga hwegomba hw’omubiri.

## 14

### *Mutasaliranga bahyenywe musango*

<sup>1</sup> Musangaalirenga owahyenywe atali mudimamu mu hufugiirira era mutanahananga ni naye hu biitu ebiṅamba hu ngeri eyi omuutu oyo aṅega hu hino ni nahira. <sup>2</sup> Abaatu abandi balya hiisi hiitu olw’ohufugiirira hwawe. Aye abandi abali n’ohufugiirira ohudiidiri balya eryani ery’amagala lyonene. <sup>3</sup> Aye oyo alya hiisi hiitu atatalanga oyo otalya byosibyosi. Ni nooyo

\* [13:9](#) [13:9](#) [Hun 20:13-15,17](#)

atalya ebiitu ebindi atasalira oyo alya hiisi hitu omusango olwohuba Hatonda samwesamba. <sup>4</sup> Ndiwe ani owoloobya omuñeeresu wabeene? Musengwa waawe nj'asalaño hanye ehi baholire hirañi oba hibi. Era olw'amaani ga Musengwa baja huñangula.

<sup>5</sup> Eriyo ajeega ati oludaalo hirebe luhira oludaalo hirebe ohuba olwenjabulo, owundi ati endaalo josijosi jinjeranerana. Ese ndoma ti hiisi muutu agumirenga hu hyañeega ati nj'ehituufu.

<sup>6</sup> Oyo ahusa oludaalo hirebe ohuhira olundi, ahihola olw'ohuñ Musengwa enono. Ni nooyo alya enyama, alya lwa Musengwa olwohuba geyaasa Hatonda. Ni nooyo atalya ahihola lwa Musengwa olwohuba yeesi geyaasa Hatonda. <sup>7</sup> Enjume muutu hu efe aliño ohwesangaasa omwene. Era ni huba ni hufuuye oba ni huhiriño balamu, enuma ewenuga omwene. <sup>8</sup> Ni huba balamu, hubaño lwa Musengwa. Era ni hufa, hufa hu lwa Musengwa. Olw'ehyo, mbo hufa mbo huba balamu, husigala ni huli baatu ba Musengwa.

<sup>9</sup> Olw'esonga enyene yino, Kurisito gafa gaahena galamuha ko abe Musengwa w'abalamu n'abafu. <sup>10</sup> Naahani ewe otalya enyama, lwahiina osalira omulebe wuwo omusango? Ni neewe olya lwahiina otala mulebe wuwo otalya? Hwesihwesi hunaheerere mu moni ja Hatonda ohutusalira omusango. <sup>11</sup> Hyañandiihiwa hiiti;

“Musengwa aloma ati,  
 'ng'olu ndi Hatonda omwene bulamu,  
 hiisi muutu alikubbira amafuha.  
 Era hiisi muutu

alinjumirya olwohuba ndiise Hatonda.’ ”\*

<sup>12</sup> Olw’ehyo, hiisi muutu anahenjosyeho mu moni ja Hatonda omwene.

*Hutahola ebinanga ohugwisa abahyefe mu hibi*

<sup>13</sup> Naahani hulehere ayo ohusalira abafugirira bahyefe emisango aye huhole ebiitu ebigira sibesitaala hugwa mu hibi. <sup>14</sup> Ese manyire era kahasa ti mu moni ja Yesu Musengwa enjuma hyahulya ehy’embiho aye hiba hy’embiho eyiri oyo aneega ati hy’embiho. <sup>15</sup> Singa ehi olya higira mulebe wuwo gesitaala, ayo oba soohola ehiraga hiiti omwenda. Otagira mulebe wuwo oyu Kurisito gafiririra ganamba engira emunira mu husihiirira olw’ehyo ehi olya. <sup>16</sup> Otaleha ehi omanyire oti hiraŋi ohufuuha ehiduhu eyiri abaatu abandi. <sup>17</sup> Obunugi wa Hatonda sihulya n’ohunywa aye huhola ebi Hatonda asiima, emiyaaya n’esangaalo ebi Omwoyo Omutukuvu atuna. <sup>18</sup> Oyo aneereses Kurisito mu ngeri eyo, asangaasa Hatonda era n’abaatu bamusiima.

<sup>19</sup> Olw’ehyo, hufubenga ohuhola ebireeta emiyaaya n’ebiyeeda hiisi muutu ohunangala mu hufugiirira huhwe. <sup>20</sup> Otonoona mulimo gwa Hatonda olw’ebiryo. Ebiryo byosibyosi birani aye ehibi nj’ohulya ehyo ehireetera omutu owundi ohwesitaala mu hufugiirira huhwe. <sup>21</sup> Hiraŋi ohutalya nyama wayire ohunywa omwenge gwomu mizabbibbu oba ehiitu ehindi hyosihyosi ehireetera omulebe wuwo ohugwa mu hibi. <sup>22</sup> Leha ehi ofugiirira oti hiraŋi

---

\* **14:11** 14:11 Yis 45:23

ehinamba hu biitu ebyo, hisigale hyama hihyo ni Hatonda. Ali bulaŋi oyo otesalira musango hu hyaŋeega ati hiraŋi. <sup>23</sup> Aye singa omuutu aba n’ohubuusabuusa, ehiitu ni himulumirisa ohutalya ehiitu aye gatiina mu moni gahirya, aba gesaliye omusango olwohuba ehiitu hyosihyosi ehi ohola n’oŋuma hufugiirira oti hiraŋi hiba hibi.

## 15

### *Husangaasenga abahyefe*

<sup>1</sup> Efe abadimamu mu hufugiirira, huyeedenga abo abali n’ohufugiirira ohudiidiri sosi ohuholanga ebiitu ohwesangaasa efe abeene. <sup>2</sup> Hiisi muutu aholerenga abafugiirira bahye ebiitu ebi basangaasa era ebi baleetera ohuŋangala mu hufugiirira hwawe. <sup>3</sup> Ni Kurisito yeesi ebi gaholanga, sigaholanga ohwesangaasa omwene aye ng’olu hyaŋandiihiwa hiiti, “Ebi baatu baaloma ni bahuduha byagobola hu ndiise.”\* <sup>4</sup> Byosibyosi ebiri mu byaŋandiihiwa ahale bitwegeresa hube n’ohwehaliriha n’ohugobolamo amaani mu huhuumirira ebi Hatonda gasuubisa. <sup>5</sup> Hatonda agira hwaba n’ohwehaliriha era gatugobosamo amaani, abaleetere ohuba n’obulala mu myoyo jenywe ni mweyongera ohufugiirira Yesu Kurisito, <sup>6</sup> ko muyaalire ŋalala hy’amage mu hujumiryanga Hatonda semwana ya Musengwa weefe Yesu Kurisito.

---

\* 15:3 15:3 Zab 69:9

7 Hiisi muutu ganirisenga owahye ng'olu Kurisito gabaanirisa, ehyo hireetere abaatu ohuṅa Hatonda eṅono. 8 Olwohuba Kurisito gaaja ohuṅeeresa Abayudaaya abahomole ohulaga ng'olu Hatonda ali mwesigwa owoheresa ebi gasuubisa abasehulu baawe, 9 ko Abatali Bayudaaya bajumirye Hatonda olw'ehisa hihye. Ng'olu hyaṅandiihiwa hiiti,

“Olw'ehyo nahahujumirye  
ni ndi ṅalala n'Abatali Bayudaaya.  
Nahembe enyembo ejihujumirya.”\*

10 Era nindi ehyaṅandiihiwa hiroma hiiti,  
“Enywe Abatali Bayudaaya,  
musaṅalihisyenga ṅalala n'abaatu babe abagato-  
tobola.”\*

11 Era nindi hiiti,  
“Mwesimwesi Abatali Bayudaaya,  
abaatu mwesimwesi  
mujumiryenga Musengwa.”\*

12 Era nindi naabbi Yisaaya aloma ati,  
“Mu lulyo lwa Yese,  
mulinwamo anahaṅuge amawanga,  
esuubi ly'Abatali Bayudaaya  
liriba mu nje niye.”\*

13 Hatonda ogira hwaba n'esuubi abasagaaluse era abane emiyaaya olw'ohumufugiirira ko mweyongerenga ohuba n'esuubi olw'amaani g'Omwoyo Omutukuvu.

*Pawulo omuṅeeresa w'Abatali Bayudaaya*

---

\* 15:9 15:9 2 Sam 22:50; Zab 18:49 \* 15:10 15:10 Mag 32:43

\* 15:11 15:11 Zab 117:1 \* 15:12 15:12 Yis 11:10

14 Aboluganda, ese samwene kahahisa erala ti enywe mulimo ebirani n'amagesi era mumanyire ehyohuhola, era ti hiisi muutu ananga ohusomesa owahye. 15 Aye hu bitu ebindi mbanandiihiye ni puma hubbimbirya ni mbahebulisa ehyohuhola. Hino ciholire olw'ehisasabirisi ehi Hatonda gapambira. 16 Gafuula ohuba omunjeeresa wa Yesu Kurisito eyiri Abatali Bayudaaya. Era ng'omusengi ndomere abaatu Amanuliro Amalani aganwa ewa Hatonda. Ehyo ko hiretere Abatali Bayudaaya abafugiirira Kurisito ohuba hy'enjongo eyi Hatonda asiima, ng'Omwoyo Omutukuvu nj'abagwalaahiise.

17 Olw'ehyo, hinesiimisa mu Yesu Kurisito olw'omulimo ogukolera Hatonda. 18 Simpanga huloma hu hiitu ehindi ohutusaho ebyo ebi Kurisito gahola n'abita mu ese ehireete ye Abatali Bayudaaya ohudembuhira Hatonda olw'ebyo ebinaloma n'ebinahola, 19 ebyamaliholiho ebinahola olw'amaani g'Omwoyo Omutukuvu. Hiisi naatu ana tiinire, ohuwera erala e Yerusalemu ohwola e Yiririko, mbuliye abaatu Amanuliro Amalani mu wiijufu aganamba hu Kurisito. 20 Ohwegomba hwange hubaaye hubulira abaatu Amanuliro Amalani mu bifo ebyo eyi batanulirangaho hu Kurisito, ko taba hy'omuutu atongola hu musingi gw'owundi. 21 Aye ng'olu hyanandiihiwa hiiti;

“Abo ababatalomerangaho  
 ebimunambaho baja hufaanina,  
 ni naabo abatanulirangaho



ebimunambaho banahamutegeere.”\*

<sup>22</sup> Yino nj'esonga eyibayenga ni yipambiri-  
iye ohuuja eyo, mbaaye mbuulira Amanuliro  
Amalanji mu matwale ago.

*Pawulo ategeha ohuhyala e Rooma*

<sup>23</sup> Aye n̄aahani ng'olu kenire omulimo gwange  
mu matwale ago era ng'olu kenire emyaha  
mingi ni negomba ohuuja ohubabonaho.

<sup>24</sup> Nahabahyalireho ni tiina e Supeyini, mbeho ni  
nenywe era mupeho obuyeedi ko neyongereyo.

<sup>25</sup> Aye n̄aahani ndi hutiina e Yerusaalemu  
ohunjiriraho abaatu ba Hatonda obuyeedi.

<sup>26</sup> Abafugiirira ab'e Makedoniya n'abe Akaya  
n'esangaalo basalaŋo ohuyeeda ebibbubbu  
by'abafugiirira abagadi abali e Yerusaalemu.

<sup>27</sup> Ehyo bahiholiire ni bahyesimiiye abeene era  
bali n'ebbanja ohuyeeda abaatu ba Hatonda  
abagadi mu Yerusaalemu. Olwohuba Abatali

Bayudaaya basuna ekabi ej'omwoyo mu  
Manuliro Amalanji ohunjwa hu Bayudaaya,  
mu ngeri nj'enyene basaniiye boosi ohuyeeda  
Abayudaaya n'ebiitu ebyahabuhya.

<sup>28</sup> Ni nahabe ni kenire ohubanirira obuyeedi,  
nahabitireho eyo nabahyaliraho ko neyongereyo  
e Supeyini. <sup>29</sup> Manyire ti Kurisito anahatuŋe  
ekabi hwesihwesi ni nahaaje eyo.

<sup>30</sup> Mbegayiriye balebe bange, hu lwa Musen-  
gwa weefe Yesu Kurisito n'olwohwenda ohu  
munyenda ohu Omwoyo Omutukuvu gabaŋa,

---

\* 15:21 15:21 Yis 52:15

huḡambire ḡalala mu husaba hu lwange na-haaja eyo. <sup>31</sup> Munombere muuti abo abatafugi-irira Yesu Kurisito abali mu Buyudaaya batan-josaho hisago, era n'abaatu ba Hatonda abali mu Yerusaalemu basiime obuḡeeresa wange. <sup>32</sup> Anḡo ni huliba husiima hwa Hatonda niije ni nejuuye esangaalo hugobosaniemo amaani. <sup>33</sup> Hatonda agaba emiyaaya abe ni nenywe mwesimwesi. Amiina.

## 16

### *Obuheese*

<sup>1</sup> Leha mbanjulire mboojo yeefe oyu balanga baati Feyibbe, omuḡeeresa w'ehibbubbu hy'abafugiirira Kurisito ehiri mu Kekiriya, alihuuja eyo. <sup>2</sup> Mbasunga mumusangaalire mu kola eḡeesa Musengwa eḡono. Era mumuḡe obuyeedi wosiwosi obu aba ni genda, yeesi abaye ayeeda abaatu bangi nga keesi pomundi.

<sup>3</sup> Keesaho Pulisikira n'Akwila aba kola ni naabo mu huḡeeresa Yesu Kurisito. <sup>4</sup> Abo bombi basinga omubiri ohuḡonia obulamu wange. Sindiise seḡene aye ebibbubbu by'abafugiirira Kurisito eby'Abatali Bayudaaya byosibyosi bibeyaasa bugali weene. <sup>5</sup> Mukeheeseho abafugiirira Kurisito abahumbaanira mu nyumba yaawe. Mukeheeseho ow'omuhago oyu balanga baati Payneeto owaali omudaayi ohufugiirira Kurisito mu twale ly'Asiya. <sup>6</sup> Muheese ni Malyamu ow'abafululuhanira bugali. <sup>7</sup> Keesaho abalebe bange Anduroniiko ni Yuniyasi aba nahola ni nabo obusibe mu komera. Abalebe bange abo bali n'obumanye

eyiri abahwenda era nibo banjehereera ohufugiirira Kurisito. <sup>8</sup> Muheese n'Apuliyaato ow'omuhago mu Musengwa weefe. <sup>9</sup> Mukeheese ni Wurubbanasi oyu huhola ni naye mu hunjeeresa Kurisito ko ni meeri yange Sitakiisi. <sup>10</sup> Muheeseho n'Apele ogumiiye ebigosi mu Kurisito. Era muheese n'abomumago g'Arisitobbulosi. <sup>11</sup> Mukeheese ni mulebe yange Herodiyooni. Muheese abafugiirira Musengwa weefe abomu nyumba ya Narusiiso. <sup>12</sup> Mukeheese Torofayina ni Torofisa, abahasi abahola bugali omulimo gwa Musengwa weefe. Mukeheese ni Perusi ow'omuhago, omuhasi atambiiye Musengwa weefe bugali. <sup>13</sup> Muheeseho ni Ruufusi oyu Musengwa gatobola. Muheese ni nyina ali oti hani nje maayi yange. <sup>14</sup> Muheese Asukuritasi ni Fulegooni ni Herume ni Paturobasi ni Heruma ko n'aboluganda ababamenya ni nabo. <sup>15</sup> Muheese Filologosi ni Yuliya ni Nerewo ni mboojoye n'Olipasi n'abaatu ba Hatonda bosibosi ababamenya ni nabo. <sup>16</sup> Hiisi muutu aheese owahye mu keesa ey'abaatu abagwalaafu. Ebibbubbu by'abafugiirira Kurisito byosibyosi bibahehiise.

### *Ebibono ebifundihira*

<sup>17</sup> Aboluganda, mbegayiriiye mwegendere-senga abo abahola ebiitu ebireeta ohweyabujula, byagira abaatu baanaba baleha engira etuufu eyi babasomesa. Abaatu hy'abo, mubejalamenga.

18 Abaatu abo sibaŋeeresa ba Kurisito Musengwa weefe, aye beyendulira hya hulya. Batambisa ebibono ebinyunyula n'ebiwanaawaana olw'ohwenda ohudulinga abaatu abanuma ehi bamanyire. 19 Hiisi muutu anjulira ng'olu mudembuhira Hatonda, c'ehigira ni ndi musangaafu olwenywe. Nenda mube bagesi manye ehirani ehyohuhola aye mwenjalame ehibi. 20 Hatonda ogaba emiyaaya, ali huupi huteteenera Sitaani ŋaasi w'amagulu genywe. Ehisasabirisi hya Musengwa weefe Yesu hibenga ni nenywe.

21 Temuseewo omutambi wahyange abahehiiseho. N'abalebe bange Lukiyo ni Yasoni ko ni Sosipateeri bosibosi babahehiiseho.

22 Era keesi Terutirasi omunandiihi w'ebbaluŋa yino, mbahehiiseho mu siina lya Musengwa weefe.

23 Gaayo obukumiire era omwene mago omu bafugiirira Kurisito bahumbaanira, abahehiseho. Erasito omunanika w'ehibuga\* ni Kwatasi babahehiise. 24 Musengwa weefe Yesu Kurisito abanambirenga ehisa mwesimwesi.†

25 Hujumiryenga Hatonda olwohuba asobola ohubagumya mu hufugiirira hwenywe ng'olu Amanuliro Amalanji galoma. Amanuliro ago aganamba hu Yesu Kurisito nj'agandomera abaatu. Era galoma hu hyama ehi bahweha ohuŋwa ahale nahale. 26 Aye ŋaahani ng'olu banaabbi banandiiha hu Kurisito, Hatonda oyo

---

\* 16:23 16:23 Ehibuga baali bahiranga baati Koriiso. † 16:24 16:24 Ebyanjandiihiwa ebisinga obungi binuma lunyiriri luno.

otafa galagira ehyama ehyo bahihwehule eyiri abaatu bosibosi bahamufugiirira era bamudem-buhire. <sup>27</sup> Hatonda oyo ahihenaho era omwene magesi, abaatu bamunenga enono ohubita mu Yesu Kurisito emirembe n'emirembe. Amiina.

**Endagaano Epyaha mu Lunyole**  
**Nyole: Endagaano Epyaha mu Lunyole (Bible)**

copyright © 2019 Wycliffe Bible Translators, Inc.

Language: (Nyole)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 21 Feb 2024 from source  
files dated 29 Jan 2022

e00787cd-838f-597a-9477-00b97e4e2cff